



REPUBLIKA E SHQIPËRISË
KOMISIONERI PËR MBROJTJEN NGA DISKRIMINIMI
KOMISIONERI

Nr. 920/12 Prot.

Tiranë, më 23 . 07 . 2026

V E N D I M

Nr. 206, Datë 23 . 07 . 2026

Bazuar në nenet 32 dhe 33 të ligjit 10221/2010 “Për Mbrojtjen nga Diskriminimi”, të ndryshuar, pranë Komisionerit për Mbrojtjen nga Diskriminimi është regjistruar ankesa nr. 118, datë 12.05.2026, e paraqitur nga Fondacioni “Së Bashku” kundër Bashkisë Tiranë, në të cilën pretendohet për diskriminim për shkak të “aftësisë së kufizuar”. Gjatë shqyrtimit të ankesës, Komisioneri,

K O N S T A T O N:

I. Parashtrimi i fakteve sipas subjektit ankues

Sipas shpjegimeve të dhëna në formularin e ankesës, subjekti ankues, ka parashtruar se: *“Piramida e Tiranës është një nga atraksionet kryesore në Tiranë dhe për këtë arsye është një objekt i rëndësishëm. Për më tepër, ajo është rindërtuar kohët e fundit dhe për këtë arsye, sipas ligjit 93/2014 “Për përfshirjen dhe aksesueshmërinë e personave me aftësi të kufizuara” dhe ligjit 107/2014 “Për planifikimin dhe zhvillimin e territorit”, duhet të ishte bërë plotësisht e aksesueshme për personat me aftësi të kufizuara.*

Si organizatë kemi vënë re problemet e mëposhtme:

- 1. Hyrja kryesore nuk është e aksesueshme edhe pse mund të ishte bërë shumë lehtë e aksesueshme për personat me aftësi të kufizuara. Kjo është një shenjë se personat me aftësi të kufizuara nuk meritojnë të njëjtat mundësi si njerëzit e tjerë dhe duhet të fshihen.*
- 2. Ekziston një hyrje anësore e cila është e aksesueshme, por është mjaft e vështirë dhe një labirint, më e rëndësishmja, nuk ka tabela që tregojnë se një hyrje e tillë është e disponueshme për personat me aftësi të kufizuara, kështu që një turist nuk mund ta hamendësojë atë. Për më tepër, kjo hyrje kërkon një çelës për t'u aksesuar, gjë që përsëri e bën të pamundur përdorimin e saj.*

3. *Nuk ka sinjale që drejtojnë në tualetet e aksesueshme që janë të disponueshme në ndërtesë.*
4. *Ashensori nuk është i disponueshëm për t'u përdorur nga turistët me aftësi të kufizuara sepse përsëri duhet të kontaktoni dikë për të përdorur çelësin.*
5. *Për më tepër, sapo të arrini në majë, ka një pengesë tjetër për të shijuar panoramën.*
6. *Nuk ka elementë taktile në tokë për personat e verbër”.*

Subjekti ankues, kërkon nga Komisioneri për Mbrojtjen nga Diskriminimi, konstatimin e diskriminimit dhe përmirësimin e situatës në mënyrë që piramida të jetë e aksesueshme për personat me aftësi të kufizuara.

II. Procedura e ndjekur nga Komisioneri

Komisioneri mori në shqyrtim ankesën bazuar në kompetencën e parashikuar nga neni 32, pika 1, gërma “b”, të ligjit nr. 10221/2010 “*Për Mbrojtjen nga Diskriminimi*”, të ndryshuar, që i jep të drejtën për të shqyrtuar ankesat e paraqitura nga organizatat që kanë një interes të ligjshëm, për çështje që lidhen me interesa kolektive. Konkretisht në këtë dispozitë sanksionohet sa vijon: “1. Komisioneri ka kompetencë: ... b) të shqyrtojë ankesat nga organizatat që kanë një interes të ligjshëm për të vepruar në emër dhe me pëlqimin me shkrim të individëve ose grupeve të individëve që pretendojnë se ka ndodhur diskriminimi ose në emër të tyre për çështje që lidhen me interesa kolektive;”

Ankesa e paraqitur është në përputhje me kërkesat e nenit 33, pika 3, të LMD-së dhe u pranua për shqyrtim, pasi nuk ekziston asnjë nga shkaqet për mospranim të përcaktuara nga neni 33, pika 4, të LMD. Në zbatim të parashikimeve ligjore, të neneve 32 dhe 33, të ligjit nr. 10221/2010 “*Për Mbrojtjen nga Diskriminimi*”, të ndryshuar, Komisioneri për Mbrojtjen nga Diskriminimi ka ndërmarrë hapat si më poshtë:

1. Me shkresën nr. 920/1, datë 14.05.2026, Komisioneri ka njoftuar dhe kërkuar parashtrime nga Bashkia Tiranë, lidhur me pretendimet e subjektit ankues. Bashkia Tiranë ka marrë dijeni për këtë shkresë, fakt ky që rezulton i provuar nga lajmërim marrja e shërbimit postar nr. RR838545432AA administruar në dosje, por nuk ka dërguar informacionin dhe dokumentacionin e kërkuar.
2. Me shkresën nr. 920/3, datë 17.06.2026, Komisioneri i është drejtuar sërish Bashkisë Tiranë, me një kërkesë të përsëritur për informacion dhe dokumentacion në lidhje me çështjen. Në shkresën e sipërpërmendur, Komisioneri i bën kujtesë subjektit, për të dërguar informacionin dhe dokumentacionin e kërkuar brenda datës 22.06.2026, duke i sjellë në vëmendjen se mosplotësimi i kësaj kërkesë, përbën shkelje të dispozitave të LMD-së. Bashkia Tiranë ka marrë dijeni për shkresën me datë 19.06.2026, fakt ky që rezulton i provuar nga lajmërim marrja e shërbimit postar me nr. RR836043530AA, por nuk ka dërguar informacionin dhe dokumentacionin e kërkuar.
3. Bazuar në nenin 33/8, të LMD, të ndryshuar ku parashikohet se: “*Kur e sheh të përshtatshme, komisioneri zhvillon një seancë dëgjimore publike dhe fton palët dhe çdo person tjetër të interesuar*”, si dhe për të administruar informacionin dhe dokumentacionin e kërkuar si dhe

për të sqaruar të gjitha faktet dhe rrethanat e çështjes, me shkresën nr. 920/6, datë 13.07.2026, Komisioneri njoftoi palët për zhvillimin e një seance dëgjimore më datë 22.07.2026.

Bashkia Tiranë nuk u paraqit në seancë dëgjimore dhe nuk depozitoi informacionin e nevojshëm për shqyrtimin e ankesës, të kërkuar zyrtarisht nga Komisioneri.

III. Pas kryerjes së hapave të mësipërm proceduralë, Komisioneri çmon se:

Bashkia Tiranë, si subjekt kundër të cilit është paraqitur ankesa nr. 118, datë 12.05.2026, që i përket palës ankuese Fondacioni “Së Bashku”, me dijeninë e plotë nuk ka mbështetur Komisionerin në ushtrimin e kompetencës së tij ligjore për të shqyrtuar ankesat për diskriminim, të përcaktuar në nenin 32/1/b, të LMD-së duke mos dhënë informacionin dhe dokumentacionin e plotë të kërkuar nëpërmjet shkresave nr. 920/1, datë 14.05.2026, nr. 920/3, datë 17.06.2026 dhe nr. 920/6, datë 13.07.2026.

Duke mos dhënë informacionin dhe dokumentacionin e kërkuar nga Komisioneri, Bashkia Tiranë nuk ka përmbushur detyrimin ligjor të parashikuar nga neni 32/2, të LMD-së, sipas të cilit: *“2. Të gjitha institucionet publike dhe subjektet private janë të detyruara të mbështesin Komisionerin, duke i dhënë informacionin që i nevojitet dhe duke i garantuar aksesin në informacion në përmbushjen e detyrave të tij”*. Ky mosveprim, kjo mospërmbushje e këtij detyrimi ligjor, në bazë të nenit 33/13, të LMD-së shoqërohet me marrjen e masës administrative, gjobë.

Për sa më sipër, Komisioneri për Mbrojtjen nga Diskriminimi arrin në konkluzionin se, Bashkia Tiranë, është në shkelje të detyrimit ligjor të përcaktuar në nenin 32, pika 2, të LMD-së, shkelje e cila sipas nenit 33/13, të po këtij ligji, është e dënueshme me gjobë.

Për personat juridik, siç është në rastin konkret është Bashkia Tiranë, neni 33, pika 13, të LMD-së, përcakton shkrehimisht: *“Çdo person që shkel dispozitat e këtij ligji dënohet me gjobë si më poshtë”:..... b) personi juridik nga 60.000 deri në 600.000 lekë;.....”*

Në lidhje me përcaktimin e masës së gjobës, Komisioneri mban në konsideratë parashikimet dhe kriteret e vendosura në nenin 33, pika 12, të LMD-së, ku sanksionohet se: *“12. Kur vendos masën, komisioneri siguron që ajo të jetë: a) e efektshme dhe parandaluese; dhe b) në përpjesëtim me gjendjen që e shkaktoi vendosjen e masës. Nëse vendoset gjobë, komisioneri përcakton shumën e gjobës duke marrë parasysh: i) natyrën dhe fushën e veprimit të shkeljes dhe ndikimin mbi viktimën; dhe ii) rrethanat personale e financiare të shkelësit, veçanërisht duke marrë në konsideratë të gjitha burimet e të ardhurave dhe nëse shkelja kryhet nga një person juridik privat, merren parasysh aktivet e bilancit dhe fitimi, si dhe pagat totale të paguara punonjësve; c) nëse e njëjta shkelje diskriminon disa persona, vendoset vetëm një gjobë, por duke marrë parasysh kërkesat e shkronjës “b” të këtij neni”*.

Duke mbajtur në konsideratë kriteret e mësipërme për përcaktimin e masës së gjobës dhe bazuar në faktin që, e drejta e pretenduar nga pala ankuese, sikurse është e drejta për aksesueshmëri për personat me aftësi të kufizuara si dhe faktin që nga ana e Bashkisë Tiranë është treguar mungesë e përsëritur bashkëpunimi me Komisionerin për sigurimin e informacionit të nevojshëm për

shqyrtimin e ankesës, Komisioneri, arrin në përfundimin se, Bashkia Tiranë duhet të gjobitet me 60.000 (gjashtëdhjetë mijë) lekë, për mosdhënien e informacionit të kërkuar zyrtarisht nga Komisioneri për Mbrojtjen nga Diskriminimi.

PËR KËTO ARSYE:

Bazuar në nenin 32, pika 1, germa “ç” dhe pika 2, nenin 33, pikat 11, 12, 13, germa “b”, 14, 18, si dhe nenin 33/1, të ligjit nr. 10221, datë 04.02.2010 “Për Mbrojtjen nga Diskriminimi”, të ndryshuar, Komisioneri për Mbrojtjen nga Diskriminimi,

V E N D O S I :

1. Bashkia Tiranë, të gjobitet në vlerën 60.000 (gjashtëdhjetë mijë) lekë, për mosdhënien e informacionit të kërkuar zyrtarisht nga Komisioneri për Mbrojtjen nga Diskriminimi, në kuadër të shqyrtimit të ankesës nr. 118, datë 12.05.2026.
2. Gjoka të derdhet në Buxhetin e Shtetit brenda një muaji nga marrja dijani, mbi masën administrative. Pagesa e kësaj vlere të bëhet pranë çdo banke në llogarinë e thesarit Tiranë, për llogari të: Komisioneri për Mbrojtjen nga Diskriminimi, NIPT: L02027451K, Kodi: 1091001, Entiteti i Qeverisjes: 001, Distrikti (TDO) 3535, Llogaria ekonomike: 7115499.
3. Dërgimi i informacionit të kërkuar, brenda 7 (shtatë) ditëve nga marrja dijani e këtij vendimi, sjell shfuqizimin e gjokës.
4. Kundër këtij vendimi lejohet ankim në Gjykatën Administrative të Shkallës së Parë Tiranë, brenda 45 ditëve nga marrja dijani.

KOMISIONER

Genta TAFA (BUNGO)

Konceptoi: A. Xhindi

Pranoi: V. Bushati

Datë: 22.07.2026